

Radunanza cumünela

Bannida, Missiva

Per la radunanza cumünela, ils 1. lügl 2020 a las 20.00 in sela polivalenta S-chanf

Stimedas votantas, stimos votants,

La suprastanza cumünela suottametta cotres la bannida e la missiva per la radunanza cumünela dals 1. lügl 2020 a las 20.00h in sela polivalenta a S-chanf ed invida amiaivelmaing da piglier part a quella.

La radunanza suottasto a las reglas d'igierna dal virus Corona (controlla d'entredgia, tgnair distanza, eventuelmaing mascras d'igierna).

Tractandas:

1. Protocol da la radunanza cumünela dals 27 november 2019*
2. Rendaquint 2019 + rapport da la CDG
3. Trer inavaunt il proget refacziun Via Vaüglia Suot – Via Vaüglia Sur per ün an*
4. Tscherna cumischiun da ledschas
5. Schoglier la corporaziun vschinela: adattamaints dals statüts e reglamaints*
6. Vendita da la parcella no. 828 a duonna S. Oswald*
7. Infuormaziuns
8. Varia

***La documainta per las tractandas sto ad invista/po gnir retratta tar l'administraziun cumünela u es visibla sün l'internet suot: www.s-chanf.ch**

Deutscher Text: Büchlein bitte wenden

1. Protocol da la radunanza cumünela dals 27 november 2019

Il protocol da la radunanza cumünela dals 27 november po gnir retrat ill'administraziun cumünela e'l es publicho suot www.s-chanf.ch (versiun rumauntscha).

2. Rendaquint 2019 + rapport da la CDG

Situaziun da partenza:

Tenor constituziun cumünela sto il rendaquint gnir suottamiss a la radunanza cumünela insembel cul rapport da la cumischiun da gestiun, e que fin als 30 gün da l'an seguint.

L'inquisiziun administrativa chi ho examinò e verificò l'andamaint dal forestel, da la resgia e da l'administraziun cumünela l'utuon 2019 ho constato püs maungels ill'administraziun, illa contabilted, i'l forestel ed illa resgia. L'intrapraisa incumbenzada per serrer giò il quint annuel 2019 nun es steda buna da serrer giò il quint infra temp ütil, per pudair preschanter il quint e'l rapport da la cumischiun da gestiun. Tenor l'intrapraisa incumbenzada e la nouva intrapraisa da revisiun externa nun es pussibel da preschanter il quint 2019 aunz il mais october 2020.

Proposta: La suprastanza cumünela propuona a la radunanza da suspender l'approvaziun dal quint 2019 sül mais october 2020.

3. Trer inavaunt la refacziun da la Via Vaüglia Suot – Via Vaüglia Sur

Situaziun da partenza:

Aint il plan d'investiziuns d'eira previs da fer il proget per la via l'an 2020 e da realiser quel i'ls ans 2021 e 2022. Causa cha la via es dannageda fich ferm e pel mumaint na transibla, haun las suprastanzas da S-chanf e Zuoz insembel cul forestel regiunel decis

da trer inavaunt il proget e da cumanzer cun las lavuors dalum, per cha las alps restan raggiundschiblas cun veiculs.

Il proget vain fat insembel cun la vschinauncha da Zuoz. Ils cuosts vegnan scumpartieus tenor la clef cunvenziuneda già tar progets anteriuors; cuosts per la via fin Vaüglia Suot 2/3 S-chanf e 1/3 Zuoz, e da Vaüglia Suot fin Vaüglia Sur 1/3 S-chanf e 2/3 Zuoz.

Per cha'l proget gnia subvenziuno dal chantun es sto da garantir cha'l god da dschember da Zuoz sto gnir separo dal pascul cun üna saiv electrica. Mainaproget es il uffizi da god e prievels da la natüra suot la bachetta da la vschinauncha da Zuoz.

Tenor il plan d'investiziun 2020-2024 sun deliberos per quist proget l'an 2020 fr. 40'000.00 / l'an 2021 fr. 100'000.00 e per l'an 2022 fr. 100'000.00.

Il proget vegn subvenziuno cun 60% dal chantun.

Proposta:

La suprastanza cumünela propuona a la radunanza da trer inavaunt las lavuors e da cumanzer immediatamaing cun quellas.

4. Tscherna cumischiun da ledschas

Situaziun da partenza:

Per pudair cuntinuer cun las surlavuraziuns da las ledschas e reglamaints es da cumpletter la cumischiun da ledschas. Fin uossa d'eiran seguintas personas illa cumischiun:

- Claudio Caratsch (barmör)
- Heinz Thomas
- Rita Melcher
- ed il president cumünel ex ufficio Gian F. Largiadèr

Pel mumaint sun be pü duonna Rita Melcher e sar Riet R. Campell illa cumischiun. Per cuntinuer cun las lavuors es da cumpletter la cumischiun cun 2 – 3 persunas. Fin uossa nu vains chatto üngüinas persunas chi's mettan a disposiziun per quista lavur. Nus ans allegrains sün candidaturas our da la populaziun per quista lavur a bön da la vschinauncha. Interessos/interessedas paun s'annunzcher in chanzlia.

5. Schoglimaint da la Corporaziun Vschinela da S-chanf

Situaziun da partenza:

Cun data dals 27 november 2019 ho la radunanza vschinela decis unanimamaing da schoglier la Corporaziun vschinela da S-chanf. La vschinauncha politica ho infurmo a las autoriteds sur dal schoglimaint da la Corporaziun vschinela da S-chanf.

Tuot las lezchas da la Corporaziun vschinela vegnan surdedas a la vschinauncha da S-chanf (possess, il dret da vschinedi, gestiun da fondos, eui.).

Per serrer quista lavur es da revair la constituziun cumünela e las consequenzas per ledschas e reglamaints chi pertuochan a la Corporaziun vschinela.

Proposta:

La suprastanza cumünela propuona d'incumbenzer a la cumischiun da ledschas cun l'adattamaint da la constituziun, reglamaints e contrats a regard il schoglimaint da la Corporaziun vschinela e da suottametter quella alura a la radunanza cumünela.

6. Vendita parcella no. 828 a duonna S. Oswald

Situaziun da partenza:

Il 10 schner 2020 ho duonna Sonja Oswald dumando da cumprer üna parcella dal quartier da fabrica per indigens a Chapella. Zieva püs adattamaints ho ella comunicho, ch'ella cumpress gugent la parcella no. 828 a Chapella. Our dal punct da vista da planisaziun es quista situaziun in uorden, causa ch'ella vuless cumprer terrain aint in quella part dal quartier chi'd es già in fabrica. Las cundiziuns per l'acquist da terrain tenor il reglamaint da cumprita sun dedas cun que cha duonna Sonja Oswald d'eira domiciliada illa vschinauncha da

S-chanf a partir dal mais meg 1992 fin schner 2000. Cun que es la pretaisa da 5 ans accumulida. Il predschi s'amunta a fr. 300.00 al m².

Proposta:

La supranza cumünela propuona a la radunanza cumünela da vender la parcella no. 828 a duonna S. Oswald.

7. Infuormaziuns

La supranza cumünela infurmescha sur dals progets dals different decasteris.

8. Varia



S-chanf, ils 15-06-2020

Per la suprananza

Il president: Riet R. Campell

L 'actuar: Carlo Planta Wildenberg

